



XUNTA DE GALICIA

VICEPRESIDENCIA PRIMEIRA E
CONSELLERÍA DE PRESIDENCIA,
XUSTIZA E TURISMO



CONVENIO DE COLABORACIÓN ENTRE A AXENCIA TURISMO DE GALICIA, O CONCELLO DE ARNOIA E ABANCA CORPORACIÓN BANCARIA S.A. PARA A CELEBRACIÓN DA XLI FESTA DO PEMENTO

O xerente de Turismo de Galicia

DECLARA:

Que esta Axencia Turismo de Galicia formalizou Concello de Arnoia e ABANCA Corporación Bancaria, S.A., o instrumento convencional arriba referido por un período de vixencia que abrangue dende o día da súa sinatura ata o 31 de decembro de 2020.

Que o instrumento convencional ten por obxecto establecer o marco de colaboración para a promoción da XLI Festa do Pemento. O Concello como entidade organizadora dos actos da festa ven desenvolvendo unha labor de continuidade no campo da promoción e difusión do turismo.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- Que o Concello ten competencias en materia de turismo, de acordo co disposto no artigo 25.2.h) da Lei 7/1985, do 2 de abril, reguladora das bases do réxime local, posto en relación coa Lei 7/2011, do 27 de outubro, do turismo de Galicia, no exercicio das cales desenvolve diversas actuacións entre as que cabe destacar a celebración da XLI Festa do Pemento Virtual.

O concello de Arnoia emprendeu hai corenta anos a celebración dunha festa no campo da Queixeira, co gallo de enxalzar o produto agrícola por excelencia desta localidade o pemento de Arnoia. Existindo nestas terras desde principios do pasado século o cultivo do estimado e saboroso pemento de Arnoia, e sendo creada no ano 1969 unha cooperativa para ocuparse da comercialización deste singular produto, constatábase o interese, por parte da poboación do



Xacobeo 2021





XUNTA DE GALICIA

VICEPRESIDENCIA PRIMEIRA E
CONSELLERÍA DE PRESIDENCIA,
XUSTIZA E TURISMO

galicia

lugar, da posta en práctica dalgún tipo de evento que, á vez que realce a exclusividade do pemento desta zona, contribúa a difundir as delicadas calidades do mesmo ao maior número posible de xentes doutros lugares.

Madurando e ampliándose co transcorrer do tempo esta inquedanza, vai tomando corpo a idea de organizar unha festa que difunda as virtudes deste produto, ao mesmo tempo que potencie a súa comercialización a maior escala; é, neste punto, cando xurde e se acepta a proposta de realizar a primeira FESTA DO PEMENTO DE ARNOIA que tivo lugar os días 1, 2 e 3 de agosto de 1980.

Os tres días da Festa do Pemento de Arnoia celébranse todos os anos coincidindo co primeiro domingo de agosto. Este ano 31 de xullo, 1 e 2 de agosto de 2020. As razóns que levan a escoller esta data son: a coincidencia coas festas patronais de Arnoia, onde entre os pratos da mesa festiva nunca faltan os pementos en diversas preparacións. En segundo lugar que se intenta evitar a coincidencia con outras festas xa establecidas en datas fixas e así acadar un día propio no nutrido calendario de festas gastronómicas. Tamén que se trata dunhas datas idóneas cara o turismo, por ser lugar de paso e próximo á costa, contar con boas comunicacións e ser época de chegada dos emigrantes.

Pero a principal razón de todas, e o pemento de Arnoia, protagonista do evento, atópase na época de mellor produción e no óptimo de sazón, motivado polas abundantes horas de sol e o bo facer das arnoiesas, descubrindo a plenitudes das súas calidades que o converten en único.

Na presente anualidade, e por mor da Covid-19, e en aras de non perder a tradición desta festa declarada de interese turístico galego, preténdese a realización de actos e eventos de promoción do pemento e de exaltación do mesmo, mediante catas, concursos e foros virtuais en redes sociais.

Atendendo á importancia acadada no calendario de celebracións gastronómicas o Consello da Xunta de Galicia do 4 de outubro de 2001 acordou declarar á Festa do Pemento de Arnoia como festa de Galicia de interese turístico, de conformidade co establecido no Decreto 39/2001 do 1 de febreiro.



Xacobeo 2021





XUNTA DE GALICIA

VICEPRESIDENCIA PRIMEIRA E
CONSELLERÍA DE PRESIDENCIA,
XUSTIZA E TURISMO

galicia

Segundo.- Que a Axencia Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, polo que se crea a Axencia de Turismo de Galicia, é a entidade pública instrumental do sector público autonómico de Galicia á que lle corresponde o exercicio, entre outras, das competencias en materia de fomento e competitividade do turismo.

Terceiro.- Que a Lei 7/2011, do 7 de outubro, do turismo de Galicia, establece no seu artigo 93, baixo a rúbrica de festas de interese turístico de Galicia, que a Administración da Xunta poderá declarar festas de interese turístico de Galicia aquelas manifestacións que supoñan unha valorización da cultura e as tradicións populares e teñan unha especial importancia como atractivo turístico.

Estas festas de interese turístico de Galicia poden obter cumprindo os requisitos establecidos na normativa estatal de aplicación, a declaración de festas de interese turístico nacional e internacional.

O apoio ás festas de interese turístico, é unha das liñas estratéxicas de traballo de Turismo de Galicia por considerar este tipo de eventos como un elemento esencial para ou desenvolvemento turístico de Galicia no que atinxe á divulgación da oferta turística galega vinculada aos extraordinarios recursos turísticos deste país e impulsando así a mellora económica do sector.

A este respecto, o Plan Estratéxico do Turismo de Galicia 2020 na Liña estratéxica 2, obxectivo estratéxico 2.1. Singularización de novos valores diferenciadores, Acción 2.1.3. Enfoque turístico do patrimonio inmaterial, inclúe o impulso da creación de produto en torno ás Festas de Interese Turístico.

Cuarto.- Que a Axencia Turismo de Galicia está interesada en apoiar ao Concello no desenvolvemento da festa indicada no expoñendo primeiro por ser unha iniciativa de relevancia para a divulgación da oferta turística galega vinculada ás festas de interese turístico, como medida de promoción e fomento do turismo para o impulso da mellora económica do sector. Concorren así, aos efectos do establecido nos artigos 19.4.c) e 26.2 a) da Lei 9/2007, do 13 de xuño, de subvencións de Galicia, e 36.c) e 40.1a) do Regulamento da dita lei, aprobado polo Decreto 11/2009, do 8 de xaneiro, razóns de interese público para o outorgamento da



Xacobeo 2021





XUNTA DE GALICIA

VICEPRESIDENCIA PRIMEIRA E
CONSELLERÍA DE PRESIDENCIA,
XUSTIZA E TURISMO



subvención. Así mesmo, dada a especialidade do obxecto do convenio, non procede a realización dunha convocatoria pública ao ser o concello arriba indicado a única entidade organizadora deste evento.

Quinto.- Que ABANCA é unha entidade que opera no sector financeiro e bancario, con gran tradición e arraigamento no territorio da Comunidade Autónoma de Galicia, lugar onde naceu e desenvolve gran parte do seu obxecto social na actualidade e considera dende un punto de vista publicitario e do marketing que é unha grande oportunidade para dar a coñecer directamente a súa imaxe corporativa e de forma indirecta os seus produtos, difundir o seu logotipo no ámbito das festas de interese turístico tanto de Galicia, como nacionais e internacionais e contribuír así ao apoio e difusión das mesmas.

Que a través deste convenio, outórgase ao Concello de Arnoia unha subvención directa en virtude do disposto no artigo 19.4 c) da Lei 9/2007, do 13 de xuño, de Subvencións de Galicia, polas razóns de interese público, social, económico e humanitario expostas nos puntos anteriores que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago de Compostela
O xerente de Turismo de Galicia

Emilio José de la Iglesia Lema



Xacobeo 2021

